

長葛縣志

卷之九
卷之十

藝文志
藝文志

下 上

長葛縣志卷之九

直隸許州長葛縣知縣阮景咸續修

藝文志

詔勅

碑記

贊

記

詩

書

聖王致治宜民莫不興行文教是詔語不能廢於

廊廟而章程不能緩於郡邑者也葛邑上自溫綸

下而輿頌他如名賢令宰之紀述缺失已多補綴

舊聞凡恩榮下逮政教流傳者悉爲載述庶幾揚

徽音於邦國而存典則於臣民也

藝文上

詔勅

碑記

漢

褒黃霸詔

宣帝神爵三年

詔曰潁川太守霸宣布詔令百姓鄉化孝子悌弟
貞婦順孫日以衆多田者讓畔道不拾遺養視鰥
寡瞻助貧窮獄或八年亡重罪囚吏民鄉於教化
興於行誼可謂賢人君子矣書不云乎股肱良哉

其賜爵關內侯黃金百斤秩中二千石潁川孝弟有
行義民三老力田皆以差賜爵及帛

明

封城隍制

制曰帝王受天明命行政教於天下必有生聖之
瑞受命之符此天示不言之妙而人聞見所及者
也神司淑慝爲天降祥亦必受天之命所謂明有
禮樂幽有鬼神天理人心其致一也朕君臨四方
雖明智弗類代天理物之道實留於衷思應天命

此神所鑒而簡在

帝心者君道之大惟典神天有其舉之承事惟謹長
葛縣城隍聰明正直聖不可知固有超於高城深
池之表者世之崇於神者則然神受於天者蓋不
可知也茲以臨御之初與天下更始凡城隍之神
皆新其命睠此縣邑靈祗所司宜封曰鑒察司民
城隍顯佑伯顯則威靈丕著佑則福澤溥施此固
神之德而亦天之命也司於我民鑒於邑政享茲
典祀悠久無疆王者施行

洪武二年正月

漢

陳太邱碑

蔡邕

先生諱實字仲弓潁川許人也含元精之和應期
運之數兼資九德總修百行於鄉党則恂恂焉彬
彬焉善誘善道仁而愛人使夫少長咸安懷之其
爲道也用行舍藏進退可度不徼訐以干時不遷
貳以臨下四爲郡功曹五辟豫州六辟三府再辟
大將軍宰聞喜半歲太邱一年德務中庸教敦不

肅政以禮成化行大謚會遭黨事禁錮二十年樂
天知命澹然自逸

交不諂上愛不賣下見幾而作不俟終日及文書
赦宥時年已七十隨隱邱山懸車告老四門脩禮
閒心靜居大將軍何公司徒袁公前後招辟使人
曉諭云欲特表便可入踐常伯超補三事紆佩金
紫光國重勲先生曰絕望已久飭巾待期而已皆
遂不至弘農楊公東海陳公每在袞職群寮賀之
皆舉手曰潁川郡陳君絕世超倫大位未躋慙於

文範先生高其德望公相之位也

嘉泰三年八月丙午遭疾而終臨歿

顧命留葬所卒時服素棺槨纔周視喪事唯約用
過乎儉群公百僚莫不咨嗟巖藪知名失聲揮涕
大將軍弔祠錫以嘉謚曰徵士陳君稟岳瀆之精
苞靈躍之純天不憖遺老俾屏我王梁崩哲萎於
時庶憲縉紳儒林論德謀謚曰文範先生傳曰
郁郁乎文哉書曰洪範九疇彝倫攸叙文爲德表
範爲士則存諱沒號不亦宜乎三公遣令史祭以

中牟刺史敬弔太守南陽曹府君命官作誄曰赫
矣陳君命世是生含光醇德爲士作程資始旣正
守終又令奉禮終沒休矣清聲遺官屬掾吏前後
赴會刊石作銘府丞與北縣令赴葬荀慈明韓元
長等五百餘人總麻設位哀以送之遠近會葬于
人已上河南郡种府君臨郡追歎功德述錄高行
以爲遠近鮮能及之重部大掾以時成銘斯可謂
存榮沒哀死而不朽者也廼作銘曰峩峩崇嶽吐
符降神於皇元生抱寶懷珍如何昊穹旣喪斯文

微言圯絕來者何聞交交黃鳥爰集於塹命不可
贖哀何有極

魏

鴻臚陳君碑記

邯鄲淳

君諱紀字元方太邱君之元子也始祖有虞受禪
陶唐亦以命禹其後嬀滿當周武王時胙土於陳
君其世也君生應乾坤之純質受嵩岳之粹精內
包九德外兼百行淵深淪於不測膽智應於無方
宏裕足以容衆矜嚴足以正世然後研幾道奧涉

覽文學凡前言往行竹帛所載靡不坐談其進善也亶亶焉其誘人也循循焉是以令聞廣譽塞於天淵儀行嘉誨範乎人倫存乎本傳故畧舉其著於人事者焉顯考以茂行崇冠先儒季弟亦以英才知名當世孝靈之初並遭党錮俱處於家號曰三君故得奉常供養以修子道親執饋食朝夕竭歡及太邱君疾病終亡喪過乎哀崩傷嘔血如此者數焉服禮旣除戚容彌甚聞名心嬰言及隕涕雖大舜之終慕曾參之自盡無以踰也豫州刺史

嘉懿至德命勅百城圖畫形像於今遺越在民
日既處隱約潛躬味道足不踰闕廼覃思著書三
十餘萬言言不務華事不虛飾其所交釋合簪規
聖哲而後建旨明歸焉今所謂陳子者也初平之
元禁網蠲除四府並辟弓旌交至雖崇其禮命莫
敢屈用大將軍何進表選明儒君爲舉首公車時
徵起家拜五官中郎將到遷侍中旬有八日出相
平原會孝靈晏駕賊臣秉政肆其兇虐剝亂宇內
州郡播裂戎興並戒君冒犯鋒矢勤卹民隱馴之

以禮教示之以知恥視事末期士女向方會刺史
敗於黃巾幽冀二州爭利其土地料敵知難不忍
其民爲已致死廼辭而去之於是老弱隨幕振轡
持轂輪不得轉遂晨夜間行寓於邳剡之野袁術
恣睢僭號江淮圖覆社稷結婚呂布斯事成重必
不測救君諗布不從隨與成婚送女在送君爲國
深憂廼奮策出奇以奪其心卒使絕好追女而還
離逃姦謀使不得成國用乂安君之力也惟帝念
功命作尙書令會車駕幸許拜大鴻臚實掌九儀

四門穆穆遂登補袞以熙帝載不幸寢疾年七十
有二建安四年六月卒階乎懷道處否登庸日寡
實使大業不究元勳屏建茲海內所爲嗟悼凡百
所以失望也天子愍焉使者弔祭群卿以下臨喪
塋有子曰群追惟蓼莪罔極之恩迺與邦彥碩老
咨所以計功稱伐銘贊之意遂樹斯石用監於後
其辭曰於穆上德時惟我君固天縱之夫鍾厥純
命世作則實紹斯文遭險龍潛抗志浮雲所責在
已樂存事親雖處猷畝天子屢聞廼隆卽將陪帝

作降平原寇深遂辭其民思齊古公邠土是因不
忘諗國惠我無垠復命喉舌秉國之均爰登卿士
媚茲一人如何穹蒼不授遐年眇厥在位每懷不
申股肱或虧朝誰與詢煢煢小子號泣於旻勒銘
表德久而彌新

元崔公去思之碑

袁 楠

昔柳子厚嘗曰邑有令有佐政當擇天下之士使
盡其職庶幾民安其業偉哉斯言蓋設官分職本
以爲民任賢使能乃可稱職况明王立政不惟其

官罷其人唐太宗亦嚴薦舉之人重縣令之選審
此則令之祿秩不爲卑矣居令之職者可不重其
人歟至元甲子崔徵事由省掾歷筦庫勅授長葛
尹下車以來待同僚如家人愛百姓如赤子視公
事如家事日與達魯花赤伯要觸公孜孜講求民
瘼勤者賞之惰者責之視民之疾苦饑寒若已致
之好訟之黨飾詞欺誑者卽與民辯之婚田之爭
調弄遷延者卽與裁決之公之用心可謂勞矣姑
自其大者而論之人心所以不忘於今日者有二

事焉舊本縣戶口比之鄆城不等而差役則與之
同公親錄其實以聞蒙上司均賦寬恤有除減均
一之命又百姓每年該納造作軍器物料局司左
右皆不體上司優恤之意秤斛之弊久爲民害公
奮不顧身較其斛秤致蒙上司除減公數雖他縣
之民亦受其惠蓋寬一分則民受一分之賜非公
平日以公正自持以廉勤自守曷克臻茲不寧惟
是退食之暇喜閱顏帖筆不停書或與士夫講論
終日無倦又於冬月躬率吏員講受論孟夜分乃